



Gist en l'istoriografia mancan savens biografias da dunnas. Sco p.ex. da questas dunnas fotografadas il 1885 a Castrisch. L'Archiv da cultura da dunnas vul promover da scriver biografias – da l'atgna vita u da la famiglia.

FOTO MAD/M. JEMMY-GARTMANN/J. -A. BERNHARD

Scriver l'istorgia per la proxima generaziun

L'Archiv da cultura da dunnas porscha curs da scriver biografias. Ils curs purschids avant corona han chattà in bun resun. Elavurar l'atgna istorgia u quella da la famiglia ha purtà fritg. Ussa vul l'archiv cuntinuar.

ANDREAS CADONAU/FMR

Avais vus il giavisch da scriver l'istorgia da l'atgna vita, quella da vossa famiglia u dad ina organisaziun, da voss vitg? A persunas che han in tal desideri, che na san dentant betg co realisar, nua cumenzar e co structurar l'atgna istorgia, sa drizza l'Archiv da cultura da dunnas dal Grischun. «L'Archiv porscha in curs da scriver biografias.» La manadra da l'Archiv da cultura da dunnas dal Grischun, *Silke Margherita Redolfi*, ha gia organisà curs da scriver biografias che han chattà in bun resun. «Enfin dudesch persunas èn sa participadas al curs e quai valitesch jau per fitg bun.» Per gronda part dunnas en la vegliadetgna sur 40 onns èn stadas da la partida.

Teoria e pratica

Durant dus dis èn las participantas ed ils participants sa scuntrads a Tusaun. Suenten in bloc da teoria intermediada da l'istoricra *Silke Margherita Redolfi* pon ins lavurar persul u da cuminanza vi da l'atgna tematica. «Las istorgias da la vita èn interessantas ed en il discurs pon ins zavrar las chaussas impurtantas e sa concentrar sin l'essenzial.» La manadra dal curs ha

fatg stim che betg sulet bellas e bunas experientschas da la vita chattan la via sin il palpiri. «Magari ha l'atgna istorgia chaschunà emeziuns ed era larmas.» *Silke Margherita Redolfi* punctuescha dentant ch'ella possia sustegnair auturas ed auturs sulet sco istoricra. «Jau na sun betg psicologa.» Scriver gidia dentant era da sa fatschentar cun parts da la vita main empernaivlas. Suenten l'emprim bloc dal curs sa scuntran las participantas ed ils participants in mais pli tard per tematisar la lavur e per sa fatschentar cun diversas dumondas. «La structura dal curs da scriver è sa cumprovà.»

Bunas e bellas istorgias

Da bunas è bellas istorgias ha la manadra da l'Archiv da cultura da dunnas pudì relatar. Era istorgias degnas da chattar la via en la publicità. «Per exempel las experientschas da l'emprima conductura dal chantun Grischun.» *Silke Margherita Redolfi* spera fitg che la protagonista termineschia sia lavur da scriver. Publitgar las biografias n'è dentant betg l'intent primar dals curs da scriver, ha la manadra explitgà. «Impurtant èsi da documentar la vita e quella da l'agen ambient per las proximas generaziuns.»

Il curs da scriver biografias vul far gust da scriver las experientschas persunalas per la descendenza. La generaziun pli giuvna na s'interessescha magari betg fitg per las istorgias da tattas e tats. «Pli tard vul la proxima generaziun savair tge ch'è capità pli baud e lura èsi magari memia tard.» L'Archiv da cultura da dunnas dal Grischun vul medemamain archivar la vita feminina dal Grischun ed intimescha era per quest motiv da documentar las experientschas persunalas.

Corona ha franà

L'ultim curs da scriver biografias è stà avant corona e per ils curs planisads l'avust, il november e schaner senta la manadra dal curs e da l'archiv tschertas resalvas. «Jau crai che la gliued ha anc respect da s'entupar.» Perquai porscha l'Archiv da cultura da dunnas il curs da scriver er online. «La purschida online è adattada per persunas disadas da lavurar independentamain.» Sustegn e cussegl porscha la manadra dal curs tuttina, via e-mail.

Infurmaziuns detagliadas inclus terminis ed annunzia datti via frauenkulturarchiv.ch.